

07 DECEMBRIE
RUGACIUNEA 1
SF.CUVIOS
ANTONIE DE LA SIISK

Молитва 1

О предивный чудотворче и великий угодниче Божий, преподобне отче Антоние, пастырю наш добрый, теплый заступниче и скорый помощниче; предстояй престолу Пресвятыя Троицы, призри милостивым оком на ны и на вся люди, благоговейне притекающыя к честному гробу твоему, в немже лежащыя святыя мощи твоя, от дний древних нетлением цветущыя и благодатию Животворящаго Пресвятаго Духа благоухающыя, исцеления от всяких недугов душевных и телесных неоскудно источают. Услыши нас молящихся тебе и чтущих святую память твою. Простри руке твои ко Владыце небесе и земли, страждущую страну Российскую от лютых безбожников и власти их да свободит, и да возставит престол православных царей, верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели

жизнот наш, и испроси нам оставление прегрешений наших. Моли милостиваго Бога отвратити от нас всякий гнев Его, праведно на ны движимый и сохранить не точию обитель нашу, но и вся грады и веси, и вся страны христианския, и люди живущыя в них от града и глада, от труса и потопа, от огня и меча, от нашествия иноплемнных и междоусобных брани, от смертоносных язвы и всякия пагубы и всякаго зла, даровати же нам вся к жизни временней благопотребная и к вечному спасению полезная. Помози нам, святче Божий, избежать пагубных сетей диаволих, препобедити соблазны мира и умертвити уды наша сущыя на земли; отврати очи наши от суетных и прелестных вещей земных, направи же умы и мысли наша к зрению красот божественных, пренебесных и нетленных; сердца наша, недугующая страстями греховными, исцели, да не прильпнут сластем привременным, и безместным; согрей же я божественною любовью, да вождедеют истиннаго и непреходящаго блаженства, еже в Бозе. Укрепи нас ко исполнению заповедей Господних, даждь нам покаяние сердечное и умиление слезное, молитву непрестанную и трудолюбие неослабное, бодренное трезвение ума и хранение сердца, мир помыслов, чистоту желаний, правоту деяний, да избавльшися тобою

от всех враг видимых и невидимых, от всяких
зол душевных и телесных, и соблюдше веру
правую, надежду неотложную и любовь
нелицемерную, богоугодне скончаем житие
наше на земли, и прешедше в жизнь вечную,
сподобимся зрети трисветлую зарю
трисияющего вечнаго Солнца, и в не вечернем
дни Небеснаго Царствія, купно с тобою и со
всеми святыми, благодарне воспевати и
благословити Пресвятую Троицу, Отца и Сына, и
Святаго Духа, во веки веков. Аминь.